




Literatura den Bon Dia

Ernesto E. Rosenstand



TUR COS A KEDA ATRAS

Di pio tabata cu e tabata consciente cu Jacinto tabata stim'e. Asina mes e no por o kier a caba cu e relacion den cua e tabata aden. Esei tabata haci cu tog de bes en cuando su consenshi tabata remorde. Bon, esei si bo por a papia di consenchi.

Continuamente e mester a bringa contra normanan di sociedad. Busca tur ora defende su conducta. Loke en realidad tabata un mision imposibel. Un conducta cu maske cuanto e por a defende no tabata corecto.

Ma asina mes keto bai e tabata pensa kico sociedad lo bisa di dje. Un sociedad cu no tabata sa nada di loke tabata pasa den su curason tormenta. Cu ta condena hende sin sa cuanto sufrimento ta pasa dor di conductanan cu segun nan no ta corecto. Ta haci cu hende ta busca tur manera pa defende su manera di actua.

Y esei mes a haci cu Carmen tabata sigui hiba dos bida. Lo extraño di tur esaki tabata cu e no tabata haci nada pa stop cu esun cu delaster tempo el a hinca su curpa aden. Y esaki tabata mortifik'e de bes en cuando. No ta tur ora.

No ta co'i loco pasa pa felis, mientras bo felicidad ta otro caminda. Y bo ta busk'e cueste loke cueste ei.

Hende nunca ta conforme. Semper ta anhela trece cambio den su bida. No ta port'e ki sacrificio mester haci pa por logra esaki. Nan ta desea di haya casi lo imposibel, y ora nan hay'e nan ta malai.

Nan ta purba otro cos. Nan ta duda. Nan no ta satisfecho. Nan kier mas. Mohenan ta anhela forma un hogar y ora nan ta asina leu nan ta bai busca nan felicidad den brasa di otro, manera un cualkiera.

Hopi biaha nan gamblemento no ta duna nan loke nan ta desea. Ma ki ta porta! Manera Carmen tabata haciendo delaster tempo. Hincando su mes den un aventura cu masha hopi riesgo.

Dia pa dia Carmen tabata desea mas y mas pa ta cerca di Juan. Su amor pa Jacinto tabata cabando poco poco. E tabata un bela cu poco poco tabata perdiendo su splendor. Tabata un anhelo ciego.

Un obseccion incomprendibel. Un forsa invisible cu e no por a domina. Nunca e por a pensa cu Juan por a drenta den su bida di un manera asina fuerte. Asina penetrante.

Su famia ni Jacinto no tabata nifica nada mas p'e. Juan tambe tabata pasa den un tempo mescos. Su bida no tabata bida mas. Mester busca manera pa bin cambio. No por sigui manera cosnan tabata bai.

Mester tuma decision pa caba cu e incridumbre

aki. Y p'esei un bon dia el a bin propone Carmen pa nan hui bai Colombia.

Ya for di basta dia e tabata canando cu e idea aki. Ma e tabata duda si esei por tabata realisabel. Ma delaster tempo mas y mas e tabata concretis'e. Y p'esei cu el a dicidi di propone Carmen esaki.

Ora Carmen a tende esaki e no tabata sa ki haci. E no a spera e proposicion aki. El a keda paralisa. Tabata manera awa friu a cai riba dje. Nunca e por a pensa riba e posibilidad aki. P'esei el a pidi Juan dun'e algun dia pa pensa.

Bai otro tera tabata algo cu ni pasa a pasa dor di su mente, anto awor ata Juan ta propone esei. E tabatin miedo di dicidi lihe lihe.

Tabata un aventura enorme, algo cu nunca e por a imagina. Cerca Jacinto e tabatin e tranquilidad cu un mohe ta desea asina tanto. Ma parce cu esei poco poco e no tabata gustando. Su sanguer tabata pidi mas cu tranquilidad. Pasobra e no tabata sintie cu e tranquilidad ei. Pasobra esaki tabata tur cos tambe.

E aventura di bai Colombia tabatin su riesgonan. Ken por a sigur'e cu cosnan lo bai bon. Ken lo por sigur'e cu lo e bai ta felis. E tabata desea bin na yiu, ma te ainda e no tabata mira nada ta muestra cu lo e haya uno.

Jacinto tambe tabata loco pa bin na yiu. Di e manera ei nan lo forma un bunita hogar. Y awor si e dicidi di bai cu Juan esei lo bai ta un decision hopi duro. Uno cu lo caba cu tur e plannan cu nan a spera di por a realisa.

- Tene pasenshi

Nan no tabatin tanto tempo casa pa e cuminsa perde speransa. Docter a sigura nan cu nan por haya yiu, ma cu nan mester warda poco. Cu tempo nan lo haya loke nan tabata desea.

Y mirando bon su bida cu Jacinto no tabata di e malo ei, ma tog... tog e tabata traicion'e bahamente.

- Pakico?

E mes no tabata sa esaki. Kisas esei tabata den su sanguer y e no por a domin'e. Pasobra, el a bin ripara cu e tabata pasiona hopi lihe. Anto e ora e no por a razona.

Delaster tempo e no tabata sa di con, ma e tabata semper cla pa aventura. Jacinto tabata ehempel di calma y serenidad. Juan di accion y pasion. Pues un contraste enorme. Y si e mester a scoge den nan dos lo el a keda cu esun delaster

Delaster tempo e tabata pensa hopi riba su bida casa. Y el a bin na e conclusion cu e no tabata sincero. Delaster tempo e tabata hibando dos bida. Na cuminsamento esaki a cuminsa torment'e, ma poco poco el a cuminsa custumbra.

Y p'esei otro biaha cu el a topa cu Juan y esaki a pidie atrobe pa nan bai Colombia Carmen a contest'e:

- Ana y e yiunan?
- Pa bo mi ta dispuesto pa laga nan.
- Asina lo bo haci cu mi despues.
- Nunca! Juan a bis'e cu energia.
- Abo p'ami ta tur cos.
- Sigur?
- Mas cu sigur. Bo ta un keintura constante cu ta core dor di mi venanan. Bin cu mi!
- Ban Colombia. Y lo bo mira con felis nos por bira. No duda bisa si y nos lo bai. `